

三省邊防備覽

三省邊防備覽 水道

淑江嚴如煜輯

水道

嘉陵江出甘肅西縣之西嶠冢山南入廣漢白水東南至江州

注江漢書地理志西縣今屬秦州白水今屬四川昭化江州

今屬合州又言漢水東南經修城道在畧又東南經槃頭郡

南在畧與濁水合又東經武城南即畧又西南經關城北在

羌又西經石亭戍屬廣元界通志秦州上邽縣嶠冢山西漢水所

出經嘉陵曰嘉陵江上邽亦屬今秦州禹貢雜指西漢水出西和縣源出

嶠冢山此上邽之嶠冢在今秦州又西經鳳縣北小峪河即

水經注之北川合秦州之紅崖河水西南流注之又經單河

歸人兩當界又西南野羊河自鳳縣之紫柏山北流合東溝
河水又屈而西北流注之又西南至畧陽界與白水江合又
西南青泥河南流注之又南橫現河東南流注之南經畧陽
城西入渡河卽水經注之北谷水寰宇記名黃坡水源發三
川西南流會城東之夾渠河卽水經注之東溪水又折而西
流經縣南注之又西南落索河東南注之又西南入寧羌界
黑水河合老兵河西流注之又西南經陽平關西燕子河西
流注之又廣平河東南流注之又西南入蜀之昭化廣元界
按嶓冢山有二一在寧羌州一在秦州在寧羌者東漢水之
源也在秦州者西漢水之源也自常璩以嶓冢爲西漢水而

唐漢水之源益多紛錯惟禹貢錐指盡掃羣疑一以經水爲
主至爲了當按畧陽白水江合故道嘉陵二流可通舟楫
起陸處經微風抵寶鷄達渭河程四百里通秦隴唐時運
關初用兵巴蜀軍精亦從此轉輸由白水江南下百餘里至
陽縣城經寧羌陽平關入蜀境迺天關至廣元縣水程五
百七十餘里歷各灘運道至險不可不詳灘名詳註於左險
灘另用小註

白水江下第一灘爲燒門子真武灘

此二灘最險

風窩子龍懼

子險

百箭石娃娃灘瓦窑灘烈馬壩灘手扒崖灘董家灘

槐樹灘匪人子灘倒灣山灘廟河壩灘禪覺寺灘琵琶樹

灘王家灘無藏灘磨鈎灘大毛溜灘鄭家灘老鴉架灘花

藍灘此灘最險呂家灘馬蹄灣灘高家壩灘此灘最險魚箭壩灘駱

驛巷灘黑沱灘兩河口灘此處合西和縣河馬連坡灘私錢洞灘

塞家河灘明水灘瓦口壩灘大燕子灘小燕子灘老鴉沱

灘最險周家灘白崖貳灘大三官灘小三官灘大小三官極險懷鄉

河灘伍家溝灘沙溝子灘險老貓灘石壁子灘馬馬灘鉗

毛灘畧陽縣城計以上自白水江起至畧陽縣城止唐盤灘

女河灘夾門子灘此灘極險荷葉壩灘大牯牛灘刈拐槐灘木

頭灘青背石灘杯杯石灘白雀寺灘泥窩子灘鐵渣灘

旋二灘旋槽灘落索河灘鸚哥石灘馬陵溝灘雷灘

鬼錯路灘石甕子灘險東沅撮灘西沅撮灘銅釘石灘高

灘子剪刀背灘此灘極險羊肉灘送潮灘險簸箕子灘焦石子

灘篋鬚子灘流溪溝灘毛埔子灘黑水灘鋸亭溝灘皮條

三灘滅河灘跳磴子灘陡張子灘險赤竹壩灘桂花園灘

陽平關灘此處至平羌州城陸路九十里自界陽縣起至陽平關止計四十一灘共水程一百五十五里

竈門子灘青便河灘龍門寺灘此灘極險鯉魚灘石龍船灘賴

毛灘竹箬子灘金剛背灘燕子福灘高角龍門灘觀音灘

最險倒灣子灘木槽溝灘三岔子灘大二郎灘小二郎灘此

灘最險涼水井灘長連子灘青灘廟入川省廣元界太白灘青巖子

灘大灘極險將軍石灘九井灘罐口灘最險彈子石灘弔耳嘴

灘沙礮子灘鎌刀壩灘虎板灘八廟灘鋤背灘三灘蕭家

灣灘謝壩子灘安樂河灘花石頭灘穿眼石灘朝天關灘

由蜀平關至此計三十九峽門口灘石子灣灘大壩口

灘樓房溝灘新開灘閭王碓灘沙河驛灘飛仙關灘大塘

子灘紫橋鋪灘千佛崖灘李家灘碑亭子灘廣元縣城

天關至縣城一十三灘共水程九十三里以上總共大小灘一百四十四灘共水程五百七十八里

漢江發源嶠冢山在寧羌州東烈金壩之西十里江初出細流

涓涓金牛峽水自南來注之至大安驛道林溝水東來注之

至蔡壩玉帶河合迴水河白巖河諸水注之玉帶河發源嶠

冢山西亦漢源也漢流至此可行小舟東行至沮水口沮水

自漢江北來注之又東行至舊州舖舊州河合山內諸水北
來注之又東下十五里養家河合阜川銅廠諸水注之又東
下五里黃沙河水北來注之又東下襄城至鼓山烏龍江卽
護水合北樓諸水南來注之又東下至漢中府南岸廉水合
襄城南鄭南壩諸水注之東行至麻柳灣冷水河合紅巖河
法慈院河響水河諸水南來注之漢水至漢中城可行百斛
鉅舟矣又東下至桃花店入城固界文川河北來注之又南
行至城固縣城南沙河合大小沙河南來注之又東行十里
至漢王城湑水河合北山諸水北來注之又東行至洋縣西

謝村橋溢水河南來注之又東行至洋縣西瀘水河北來注

之一名錢

又東至環珠廟對岸西水河合華陽茅坪諸水北

來注之又東至黃金峽口金水河合楊庄河諸水注之又東

至西縣白沙渡子午河蒲焦西岔諸水南來注之又東行至

兩河口洋川合木馬沙河諸水注之又東行至石泉界繪溪

南來注之江至石泉城下馬嶺折而南池河水東來注之南

至梅湖梅湖山水西來注之又南行至紫陽縣南岸任河卽

大竹河合四川城口定遠楮河雙河諸水南來注之江由紫

陽折而東二十五里洞河南來注之又五里汝河合界嶺諸

水南來注之又三十里大道河合六道八道河諸水南來注

之又折而東北小道河南來注之又折而東北嵐河合平河
山內八仙河平溪河磚坪山內滔河潭水河溢水河四季河
諸水南來注之又折而東月河合漢陰北山安康北山諸水
西北來注之漢水東行至興安府南黃楊河合平利北境諸
水南來注之又東行至神灘溝水南來注之又東行至閬河
合金河神河水南來注之又東行至沔陽縣東洵河合孝義
大小仁河鎮安乾祐河小河沙溝諸水西北來注之又東行
至小棕溪小棕溪北來注之又東下至大棕溪大棕溪合界
嶺諸水南來注之又東行至蜀河口蜀河合盛家河駱家河
西岔河諸水北來注之又東行至仙河口仙河北來注之又

東至藍灘漢江北岸爲鄆西縣南岸爲白河縣藍河自上津

黃村南來注之又東至甲河

俗作夾河

甲河合漫川上津諸水西

北來注之板橋河黃沙河均北來注之又東至泥河口泥河
自北來注之又東至布袋口天河合直峪河蔡家河滄河徐
洞河麥峪河諸水北來注之又東至鄆縣將軍河合紅石河
北來注之又東至堵河口塘堵河合竹山竹谿房縣西北境
諸水西南來注之又東至馬邑關武陽堰水北來注之又東
至鄆陽府城東西溪合左家河北來注之江南折至神定河
口神定河南來注之又南至安陽口龍門河東來注之又東
至遠河塘遠河北來注之漢江從此東至樊襄折而南徑至

漢陽與岷江會而朝宗於海矣江行水程較陸路爲迂漢中府城至城固縣一百三十里城固至洋縣七十里洋縣至環珠廟一百二十里環珠廟至渭門九十里渭門至漁壩九十里漁壩至石泉縣六十里石泉至漢陽坪一百二十里漢陽坪至紫陽城一百六十里紫陽至流水溪一百四十里流水溪至興安府一百四十里興安至洵陽縣一百二十里洵陽至白河縣二百八十里白河至鄖陽府二百八十里鄖陽至老河口三百六十里老河口至樊城一百八十里樊城至安陸府三百五十里安陸至仙桃鎮五百三十里仙桃鎮至漢川縣一百九十里漢川至漢口一百八十里江於夏秋漲發

最畏跑沙至沙陽以下江濶水平始無跑沙之患自均州以上至洋縣皆石灘洋縣以上均州以下則沙灘矣將均州以上著名各灘開列於左

洋縣環珠廟進黃金大峽各灘高羊角險極馬尿漚險極筍箕

漚險極栗灘子險極九斗米猪灘石大漚險極大蛟灘險極仙人掌

險極金河口險極鼈灘險極推灘子險極大瓦灘險極老虎灘鍋灘險極

大陽灘險極娘娘灘險極牛毛灘險極小渭門險極三花石串灘

險極七星壩險極瓦口子險極亂草灣險極大帶塔險極小帶塔險極

漁壩灘險極綰溪險極大紅石險極梨園灘險極猴子石險極石馬三

灘池河口險極梅湖險極山嘴子險極鬼灘子險極蝦蟆灘險極傅水

河險堙口雪陽入紫斷江石險燕子石險銅鑼灣險草園險

滾子灘險五溜子險鐵練灘險喚姑灘險大劫灘險瓦子

灘險陡大力灘險高紫陽險低紫陽險鐘鼓灘險長灘險汝

河口險爐子灘險入安折都灘險石門灘險極嘯月池險椒臘

險極插魚險極磨兒灘險絲灘險東瓜灘險高陽湖險五塊石

險八道灣險高房子險么灘子險大山嘴險小山嘴織女

灣險申灘子險火石灘險八卦巖險壘石灘險頭道巖險

神灘險極高壁洋入海朱家灣險攔馬灘險寄灣子險三岔

河新灘險極鸞鸞灘險孟家磧險構園舖險大郎灘觀音灘

險蒿塔大棕溪險極棺材灘禹王灘險老鴉三灘險極紅花灘

三省邊防備覽

卷五

水

極險鷄公灘 險仙灘 險大小藍灘 極羊皮灘 西入鄧長灘子 險

麻河灘 險大王灘 險白石灘 險邱塔灘 險羊尾山灘 險大

慶口灘 險孤山塘 險小明灘 險老鴉巖 險天河口 險金漆料

險黑灘 險大連灘 險踏魚灘 險花梨灣 險三連灘 險金花

寒險走馬出洞 險堵河口溝陰灘 險撈挖灘 險淨灘 險極診

有春滂夏淨斷絕使命之語小龍窩 險火燒石 險馬鬃灘

極險鐵打石 險琵琶灘 險大小尖灘 險龍窩灘 險都灘 險

公灘 險小弄峽 州人 均亂石灘 險石門灘 險黃瓜架魚梁灘

自此以下多沙灘矣

烏龍江即讓水發源鳳縣東北山內土人稱曰紫金河經畱壩

屬王褒城之長泰入漢江行山中數百里流亦頗鉅唐入
從此水開鑿爲通道距渭水不遠但江兩岸皆石夏秋霖雨
石砰塌江中大者如房如屋小亦如屏如牀極力鑿之來秋
復磷磷滿江矣故不能施工裝運灰石僅至褒城城下自石
門以上小舟亦不能行矣

潛水河發源盤屋山內水流亦大山慶山入城固平壩行走堰
梁鱗次大資灌溉之利兩岸堤難堅築歲虞冲决沙高流濶
舟不能行

洋川發源定遠星子山經定遠廳城蟠折山內數百里西北至
西鄉堰口會木馬河諸水又百餘里入漢江舟行由兩河口

沂流而上可至西鄉城

任河發源四川城口之黃墩自城口蟠折數百里至大竹汛始能行船下瓦房店至紫陽城南岸入漢山紫陽沂流至大竹汛三百六十里可行數十石小船花布自襄樊藥材自川省多從此載運

月河發源漢陰廳東北山內廳境資其灌溉而水流不鉅小舟僅可行三四十里

嵐河自平利兩扇門來合界嶺東北八仙河四季河漳河泊河諸流繞磚坪至安康縣西嵐河入漢其流甚長俗有八百里嵐河之稱河兩岸多石與烏龍江相似故小舟沂流

可行數十里

黃楊河發源平利南山會獅子壩舊縣諸山溝之水至安康城東十里入漢小舟僅可行二三十里

閬河合源出董家梁之神河源出梓木樹壩之金河源出平利東山之壩河北流入漢小舟可行至神河口西從壩河進亦不過三四十里以載薪柴不能運貨糧也

洵河發源寧陝老林至孝義鎮安境曰大仁河小仁河東至兩河關與源出鎮安秦嶺之乾祐河相會東南至洵陽縣城入於漢江其流甚長小舟名獨撐子載貨糧七八石由仁河進者可至猴子三灣由乾祐河進者可至下茅坪漢興兩郡之

水惟紫陽之仁河與此河可行數百里於輪轉稍有益餘或可資灌溉於載運不能得力也

甲河一名吉水俗稱夾河源出秦嶺北鵠嶺關東南流至漫川關可通小舟名獨撐子可載貨十數石又東南流至鄖西上津堡名上津河又折而東南至甲河關注於漢江關在白河縣北岸至縣城三十里

天河發源陝西山陽縣天橋北流八十里爲圓澤潭入鄖西縣界南流凌雲寨又東經南關折而南八十里至布袋口又北流南折入漢江明知縣黃翅修濬可行小舟康熙五十三年溪水暴漲凌雲寨以下俱淤失故道乾隆二十六年知縣

延槐疏濬路徑稍通

堵河會竹山竹谿諸山溪之水至鄖縣西六十里堵口塘注於漢江由堵河上六十里至黃龍灘又上至化峪河對寺河至竹山縣城三百六十里又由竹山西南沂流而上至兩河口從龍堰河塘水坪塘至竹谿縣城二百八十里均可行小舟水必源於山水必從山澗流出始至平壩秦中山多石土相雜其形方面削遇霖雨過多石土中酥則土石坍塌山溝溪河之中蜀山銳而根大其石甚堅綴石自石土自土故雖險雨水不能淋場溪澗中少壅塞漢興兩郡漢江嘉陵江而外惟任河洶河小舟可行數百里餘則流雖大不能資以轉運蜀中各郡有

水之處無不可行舟者與吳楚相似邊徼有事軍精爲要舟運之與背負勞費懸絕矣

夔州府之水在大寧巫山者曰馬連溪俗稱爲大寧河水經注稱其出於萬頃池今查大寧太平老林山內並無所謂萬頃池者河有二源東溪出一碗泉會苦草壩之水至神鹿坪西溪出九龍池會河口之水至下保河又東下至兩河口會東溪水合流至譚家墩鹽廠溪發源紅池壩西來注之南下大寧折而東南至水坪入巫山界大昌各山溝水西來注之至巫山縣城東流入於大江此河小舟自鹽廠至巫山水程二百八十里小舟上下運載鹽米雜貨其至兩河口則運煤薪

而已

雲陽縣之水曰雲陽河至縣城東十五里注於岷江小舟運載可至雲安廠

開縣之水曰開江西溪一支發源新寧之霧江坎經臨江市東流七十里至縣城北溪一支發源雪泡山至溫湯井南流六十里至縣城東江與西江相會水道考稱發源達州萬頃池者非也大寧在開縣東北四五百里而達州在開縣西北四五百里重山疊嶂相隔千里既爲開江之源又何緣爲大寧河之源開縣東溪舟行至溫湯井以上則運煤薪而已西支舟行可至臨江市會流之水東南一百二十里至雲陽之高

陽又六十里至小江口注於岷江

太平廳之水分爲前河後河中河三源後河源出於定遠交界之皮窩鋪南行七十里出水泉梨樹溪注之南過太平廳折而西南至長壩有源出八臺山之白沙河東流注之南行八十里至羅紋壩水流稍深小舟從此運載又南行八十里至東鄉普光寺與中河會中河出廳南白芷山會打杵溪响水洞井溪之水西南至固軍壩爲太平營汛又西南行八十里至普光寺與後河相會二水合流東南行至東鄉城江口與前河會前河源出廳境東南椒子壩各老林濛濛溪柳家壩諸水小白沙河北來注之又西南過亮壩子大灘河至石子

溪水北來注之又西南行八十里至東鄉城江口與後河
河相會合流而南至綏定府折而西至三匯與巴江合再西
至渠縣與渠河會名曰渠河折而東納大竹之東流溪至合
州渠口與嘉陵江會折而東至重慶府北大江中河舟行
可至固軍壩前河舟行可至大灘河

巴江源出南江縣巴山東源自貴門關西源自分水嶺至南江
縣會流南下納南境沙河子李家寨代羅觀諸水行一百八
十里至巴州城東又東南行至曾口恩陽河納石人河古溪
黃柏溪諸水西來注之東南至漸安陀漸安陀黑山溪東來
注之又東南至江口鎮與通江諸水相合通江水有數源東

則定遠之漁渡壩水長嶺河水至姚家壩入縣境竹峪關西
繞亂石子洪口九子坡下至洪山塘北則源出定遠塔壩河
經三元壩明洞子至簡池壩西南納兩河口水過洪山塘毛
峪鎮至通江縣城南西北出巴峪合平溪板橋涪陽繞縣西
至南與毛峪關河會流南下老關廟至納溪口司灘河會
場黃家溝水東來注之又西南過元山場至江口場與
河會流下風灘曰衣庵龍會沱而至三匯大約巴山之
定遠毛壩子分界南則千支萬派盡歸巴江北則千支萬
盡歸漢江則巴山固天之所以界秦蜀也巴江小舟可行
巴州城通江小舟可至鎮龍關

嘉陵江出廣元百丈關之東北寬灘河瀾城牆巖各老林經此
河東河板廟場元壩子梁山關至閬中縣東河口注於嘉陵
江

南河出廣元五郎關後老林經元灘場大石壩至廣元城南南
河口注於嘉陵江

岷江源出岷山自松番衛西北至番界三支並下至下游諸郡
漸次會合東下湖北之巴東縣而入楚界其間若金沙江則
自雲南之北勝州總滇省西北諸支流至四川之馬湖而入
江嘉陵江則自陝西之寧羌州總甘肅東南諸水至四川之
合州會涪水爲內江東至重慶府而入大江大江合三省之

水盤折數千里深遠流長故與黃河各爲南北衆流之長江之在川者兩岸東以高山川楚之交石峽千餘里至彝陵以東始入平原故自來江患蜀地絕少然峽愈峻水愈深流愈迅急順流而下瞬息百里沂流以上則處處皆險灘瞿塘灘瀨特其名之最著者耳故輸輓維艱

丹水河發源泰山在嶺北者爲藍水在南者爲丹水水經注丹水出秦塞東南流與清池水合又東流出武關入河南內鄉縣界又東南合於浙川下流與均水並流而南入於漢今考丹江在商州城南一里許東南流九十里至龍駒寨又東南下四百里至荊子關南行五百里至湖北光化縣之江口入

漢江北河通舟楫西人估吳楚者從此行走以龍駒寨爲頭
頭雇募舟楫行棧均在寨場夏秋水漲小船可至商州城隍
西採買滇銅洋銅鉛筋由此轉運爲漢唐時荆揚漕運關中
之一道河中石多灘險屢加疏鑿

三省邊境可通舟楫者只此數水渭河源發甘肅渭源縣之南
谷山東由鳥鼠山而下經清水縣而西入鳳翔府之寶雞縣繞
扶風武功盤屋郿縣而行並非山內也

唐時都關中江淮之米多由漢江沂流而上不專恃河運史稱
明皇幸蜀至扶風江淮貢獻適至其明徵也由老河口之上進
寨河卽丹水小舟可達龍駒寨陸路至西安不過四五程梁州

金州均在水次軍興之時江西湖廣轉運接濟者由漢江而進但漢江灘高流急鄖陽之龍窩洵陽之藍灘新灘其險不減灤河船質稍脆薄遇石帆破江西巡員彭淑湖北當陽人諳漢江水道所運之米專募湖南永州剝船船既堅實人亦耐勞故虧耗獨少至湖南糧米多用本省原船省一番搬移卽少一番耗損米又用布袋竹簍裝盛船戶難以偷竊遇有磕損便於起救尤經理之得宜者

川江險灘鱗次相連其著名者報部有案各灘設有救生船以備不虞雲貴運京運楚銅鉛船隻例由瀘州銅店上兌至重慶府齊幫川東道盤驗開行護送至楚境每起船二十三隻

稅夫船戶約計千人沿途州縣於銅鉛船入境必派撥兵役護送運員將所執兵牌送至州縣署粘貼印花以昭慎重但定例船身入水只准二尺八寸而各船吃水往往在五尺以外板主任意攬裝客貨丁役貪其小利運員不行禁止以至船身過重行使不能伶便遇風過淺致有疎虞則欲便運船之行走快者不致失事必須嚴禁板主不准攬裝庶幾可耳

山內聚人最多不可紀記在陝爲木紙各廠在川爲鹽井匠作私販咸壯健人夫自食其力廠中非遇山內清風糧貴停工則人夫不致散而滋事井中匠作歲歉不歇業鹽販非改配引商與之爭口岸立卡攔截亦不至生事川東之可虞時宜防範者

在大江之水手川江大船載客貨由漢陽荊宜而上水愈急則
拉把手即雜夫愈多每大船一隻載貨數百石雜夫必雇至七八
十人蕪門不過經過之地至重慶府卸載客商改雇小船分往
川北川西南其嘉陵渠潼瀘涪等江各有熟水道水手板主另
雇而行荊宜所來拉把手在重慶府河岸各棚待下水重載之
雇募下水重船需水手較上水爲少每隻多止三四十人計重
慶所至上水船每日以十船爲率是水手來七八百人所開下
水船每日亦以十船爲率是水手去三四百人以十日總計河
岸之逗留不能行者常三四千人月計萬餘矣此輩初至尚存
有上水身價漸次食完則賣所穿衣服履物久之卽成精賸

矣山中惡少無衣履赤身者謂之精勝弱則爲乞丐強則入咽喉夥黨有力者或負鹽販備作年穀豐登日食十數錢尚不至流而爲匪否則人聚過多良莠不齊饑寒生盜心矣此輩旣不能禁其不來而別無良法以處之可畏也

由巫山入川境至成都沿江設有水卡卡相距十五里各州縣視江程遠近設卡十數處二十餘處不等每卡安夫役二名稽防夫役工食暨卡中所用旗鑼由州縣捐給捐製每年川東道委員查卡十次省中委員查卡一次曉諭往來船隻停泊水卡以免疎虞然船隻行江遇風遇淺不能按定行程至晚可以避風暨不至淺擱之處卽行停泊未能悉在水卡也

江岸停畱水手流而爲匪者往往竊沿江人戶所用市賣食物薪柴小船順流夜行遇孤舟停泊卽攬船估要錢文名曰吃誣錢稍不稱意至船搶掠爲行旅之害必水卡夫役往來巡查並飭沿江小船至晚皆收歸幫各將桅舵攜回家中庶竊船亦爲無用

漢江在渭河岷江之中兩面皆有高陵長林賊可據爲巢窟擾亂地方故當軍興時漢江之防守最嚴但查漢江自城洋以上至沔縣沮口三百里淺瀨磷磷冬春水涸揭裳過之民間病涉架木橋以渡者數十處每年霜降後橋成立夏後拆之三百里均宜把淺安得有如許兵且陸路繞沮口之上其程固無多

城洋以上防江竟爲空談矣自洋縣以下至洵陽之藍灘岸六
崇山江面雖不寬水流頗深中間之可踴而過者西鄉之七星
壩上下安康之五塊石洵陽之高壁洋向皆有失事之案均宜
設重卡防堵惟漢江近年來因老林開闢至夏秋漲發各山溝
輒擁沙堆石磊積於江中亂巖險灘多昔無今有而河身墊高
踴淺可過者不止著名之四五地方往時水淺之處或竟漸次
刷深審度形勢未可膠柱而鼓瑟也

漢江上游亦有停留水手但漢江水險所通僅止興安漢中兩
郡民風尚樸上水貨船花布爲多其他蘇廣之貨難以消售來
漢興者甚少故上水船隻亦屬寥寥遇歉歲卽襄就食之民間

或攜家雇舟而來年穀豐登則此類人稀見也

東西二漢水辯

王士正

漢水有東西二源自桑欽常璩酈道元以來諸說紛紜轆轤不解予嘗兩入秦蜀于東漢則探其源于西漢則窮其委因爲辯之按百牢關下有分水嶺嶺東水皆北流至五丁峽北合漾水入沔而爲東漢嶺西水皆南流逕七盤關龍洞合嘉陵水而爲西漢常璩云漢水有二源東源出武都氏道縣漾山因名漾西源出隴西嶠冢山會白水經葭萌入漢始源曰沔故曰沔漢酈注引漢中記云嶠冢以東水皆東流嶠冢以西水皆西流卽其地勢源流所歸也

以嶓冢爲分水嶺卽此推沔水無西入之理又云東西兩川俱出嶓冢而同爲漢水按常氏以沔爲西漢水其說紕謬酈注辨之遑矣又謂東西同出嶓冢則非也且桑欽謂漾水出隴西氏道嶓冢山東至武都沮縣爲漢水而曰至廣魏與白水合又至葭萌縣與羌水合是以漾爲西漢水也又謂沔水出武都沮縣東狼谷中又曰沔水東南逕沮水戍東南流注漢是以沔爲東漢水也酈氏兩疏之而未辯其非夫禹貢嶓冢導漾東流爲漢漾之東流見于經者顯然如此余過武都嶓冢山下詢漾水土人指涓涓細流東南入沔者卽是則漾入沔合流而東其爲東漢水其源

流甚明而其上流又出分水嶺以東之水穿五丁峽而與漾合常氏既附會漾山之名以爲東漢所出又妄以沔出蟠冢合白水爲西漢是明與蟠冢導漾之文相悖桑氏又析漾沔爲二條其流迥別至云漾合白水羌水則與禹貢東流爲漢之文又大刺謬今按通典蟠冢山有二一在水上邽一在漢中金牛山雍大記云西漢水在酉和縣源出蟠冢山西流與馬池水合此乃上邽之蟠冢在今崇州又云漢江源出沔縣蟠冢山東流入金州此乃金牛山源之蟠冢禹貢蟠冢導漾乃沔縣之蟠冢非秦州之蟠冢也蟠冢有二則東西二漢源流各自了然漢之爲一

漢與隴西之嶠冢都無交涉常氏之誤可不辨而明矣
水出武都東狼谷東南流注漢水經此條在沔水下而此
又云漾水出隴西嶠冢山東至武都沮縣爲漢水不惟兩
漢水皆合於沮必無是理而漾水近在武都之嶠冢反遠
引隴西之嶠冢東流至武都爲漢其誤總在以兩嶠冢爲
一山故自爲矛盾如此酈氏於漾水條下又云通谷水出
東北通溪上承漾水西南流爲西漢水則未嘗按脉察理
而牽合桑氏之說以成其誤不知漾水實東南流無由西
南流與嘉陵白水相合也山海經云嶠冢之山漢水出焉
東南流注於沔郭璞云在武都氐道縣南蘇氏書傳云漢

始出爲漾東南流爲沔至漢中東行爲漢皆謂東漢水也
其嘉陵江自兩當峽陽出陽平關至朝天峽南逕廣元縣
又南逕昭化縣白水江自階文來入之酈氏所稱西漢水
南入嘉陵道而爲嘉陵水常氏所稱會白水經葭萌桑氏
所稱至廣魏與白水合又至葭萌與羌水合者皆謂西漢
水也黃氏曰抄云漢水二源一出秦州天水縣謂之西漢
水恭州巴中縣入江今重慶府巴縣一出大安軍三泉縣謂之東
漢水至漢陽軍入江觀此則二漢水源流益洞然矣

紛聚訟爲哉

丹江轉運紀畧

唐中宗時崔湜建言山南可引丹水通漕至商州自商鑿

山出石門抵北藍田可通輓道中宗以湜充使

唐書崔湜傳

宋歐陽修漕河議畧曰臣聞漢高祖之人秦不出東關而
道南陽過鄆析而入武關曹操等起兵誅董卓亦欲自南
陽道丹析而入長安是時張濟又自長安出武關奔南陽
則自古用兵往來之徑也臣嘗至南陽問其遺老云自鄧
西北至永興六七百里今小商賈往往行之初漢高入武
關其兵十萬夫能容十萬兵之路宜不甚狹而險也但自
洛陽爲都行者皆趨東關其路久而遂廢今能按舊而通
之則武昌漢陽鄆復襄陽梁洋金商均房光化沿漢之地

十一二州之物皆可漕而頓之南陽自南陽爲輕車人輦而遞之募置遞兵爲十五六鋪則十餘州之物日日入關而不絕沿漢之地土多美木近漢之民仰足而有餘以造舟車甚不難也前日陛下深恤有司之勤內賜金錢數十萬以供四州而道路艱遠輦運踰年不能畢至至於軍裝輸送多苦秋霖邊州已寒冬服尙滯於路其艱如此豈若較南陽之旁郡度其道里入於武關與至京師遠近等者與其尤近者皆使直輸於關西其迂曲簡直利害較然此陸運之利也

歐陽文忠集

元祐中杜紘爲大理卿因言陝西常窘兵食若養兵唐鄧

以備西成徑商於距邊畧與陝西內州軍道里等平土
易運用以飛輓利甚博事下本道議者不達遂寢集薦
康熙三十二年以關中西鳳饑將襄陽存倉米三十萬石
由丹水運至商州轉運西安減糶濟民

命學士德珠楚督丁思孔襄鎮殷化行董其事造舟潯流於二月
六日自襄裝發三月抄達龍駒寨卽轉遞四月初抵西安
開羅會時和麥登穀價驟平流散者悉歸始報罷計自襄
陽府城溯漢江歷穀城光化至均州之小江口二百八十
里入小江口經河南內鄉境至淅川一百六十里又百五
里至淅陽之荆子關又百一十五里入秦境爲商南之徐

家店又百一十里竹林關百一十里龍駒寨自襄迄塞水路凡八百七十餘里其間多支河流入其灘之險而可名者一百三十有奇至寨則陸運百里至商州又九十里秦嶺鋪踰嶺七十里藍橋四十里陟七盤至於坡下經狄寨原則七十里山藍川則九十里並抵西安城由龍駒寨至西安山路凡三百七十里襄陽至小江口多民船六七十載百數十石入小江口概用扒河船間用舢舨子船載二三十石遞減而過徐家店僅八九石船數易其價量給自襄至寨總計每石水腳銀五錢自寨用人夫背運或驢驘倍駛運人五斗驢驘倍疑過七盤下則單輪小車及驢驘

可行分三百七十里為十二站時山中食貨騰貴每五
運一站給銀五分通水陸腳價每石費銀一兩七錢米
五斗盛以布囊縫而識之率夫有長司站有官押送有兵
收發有單遞扣換驗旦暮勿稽石稱斛量無敢侵耗商洛轉漕

圖記

康熙五十九年漕運總督施世綸奉

命到陝賑恤題請將湖廣荊州等處各倉米十萬石由襄陽水運
至商州龍駒寨每石需水腳銀一兩由龍駒寨陸運至西
安每石需夫役銀二兩接濟荒民

康熙六十年施世綸復

上省邊防備覽

奏請撥運豫糧十萬石接濟陝西悉照前議惟自河南府陸
運至陝州因春夏農忙從開歸護糧道吳柯之請加增腳
價每石每百里給銀一錢

雍正九年二月十六日奉

諭陝甘二省連年豐稔官倉存貯既多民間亦家有蓋藏採辦
易便是以軍興以來儲糧充裕而民食亦寬然有餘但天時不
可預必當於既富之時先等有備之道而欲儲數年之積蓄不
得不藉資於鄰省查鄰省如山西河南之米石若由陸路輪輓
所費甚多且恐勢民若由水運則有三門砥柱之險聞從前曾
以湖廣米石由水運至商州轉運於西安上年湖廣歲收甚熟

運米石於湖廣採買米石循舊運之道運貯商州以備轉運
大學士等議奏欽此議得從前運米自荊州府運至襄陽由漢
江湖流而上雖路經二千里而可以大船裝載需用水腳
無多自襄陽漢江進小江口入丹江江流漸漸淺狹祇容
百石之船至河南所屬之淅川縣荆子關雖灘高水淺用
小舢舨河等船可以輓拽而上又自荆子關至陝西商州
之龍駒寨溪流瀉急間有灘石隨時挑濬可以行運自小
江口至龍駒寨共計水程六百二十餘里再於龍駒寨陸
運經熊耳秦嶺七盤等山計程四百一十七里遂由藍田
縣至西安皆係山行小路不通車輛從前運送米石僱募

人夫每人背米五斗日行五六十里大約驛馬騾隻馱載亦尙可行臣等查據康熙五十九年

奏冊自襄陽至龍駒寨水運脚價及打造船隻挑潯灘河之費每石需水脚銀一兩自龍駒寨至西安每石需夫役銀二兩是湖廣運送米石既有成效事在可行今運米貯商州既可省陸運之費將來設有川處轉運亦易應照康熙五十九年之例令湖廣督撫運米十萬石水運送至商州

奉因署陝

督臣查郎阿疏

奏運價繁多西安連年豐收倉廩儲積有餘商州萬山之中地方褊小難以久貯暫停運送

雍正十年十二月经畧陝甘軍務大學士伯鄂爾泰

奏准陝省存倉穀九十餘萬石散貯五府十州延安榆林及
葭鄜綏地處北邊漢中興商僻在山南其所貯積穀止自
備本處緩急難以轉運通濟歷來酌撥軍糈惟取給西風
二府及邠乾耀華同五州目今五州之穀亦只可自供儲
備是爲軍需民食計輓輸備貯皆當急爲籌畫伏查雍正
九年二月奉

旨令於湖廣採辦米石循舊運道運送商州以備轉運續據畧陝
督臣查郎阿以通價浩繁

奏請停止再查康熙三十二年並五十九年兩次將湖廣米

石運送西安俱著有成效臣等細查楚省今歲豐收每米一石不過六七錢其造船疏濬灘河及僱募駄腳等費每石不過二兩有零是現今運米一石約需三兩若下次接續運送則造船濬河之費尚可稍減而源源輓運蓄積充盈於民食兵糧實兩有神益令湖廣督撫於明春先運米十萬石或動撥倉廩或就近於襄陽等屬米賤地方採買酌量辦理

雍正十一年正月兵部尚書署理陝西巡撫史貽直奏准豫楚二省各撥運米十萬石水陸並進遴員押運陝省差員在於潼關接收豫米龍駒寨接收楚米並收豫楚口

錢轉運西安或減價平糶或借給窮民臨時辦理此次
運一切食物草料倍昂從前河南府陸運至陝州每石每
百里一錢者應照軍需案內每石每百里給腳價銀一錢
六分其自陝州靈寶閭鄉僱民船運送由三河口分載渭
河洛河黃河各水次交卸者每石每百里給水價銀四分
自水次入倉遠近不等按里數每石每十里給腳價銀一
分六釐其楚米由襄陽至龍駒寨亦無庸打造船隻若僱
民船運送則原議每石一兩尚可節省一錢自龍駒寨起
旱或騾馱或人負原議每石二兩尚可節省一兩臨時客
商豫楚督撫酌量增減據實報銷

丹江沿途各灘

丹江自龍駒寨東南一里爲界牌石灘又一里爲黃壩灘
又三里爲狼窩子灘又三里爲資峪口灘又一里爲蝦蟆
口灘兩岸有石如門又二里爲大小鷄冠灘又二里爲大
小槽口灘又一里爲月兒潭又十二里爲張家背灘又一
里爲雙廟子灘又八里爲鐵爐子灘又一里爲鐵牀子灘
又三里爲閻王廟又七里爲大小毛家灘又四里爲大小
長灘又三里爲棺材石灘又七里爲湘子灘又三里爲榛
子樹灘又六里爲大小飲食灘又二里爲菊花嘴又六里
爲桃花站又一里爲手扒灘又四里爲顧戶峽又四里爲

石碑子灘又四里爲王家園灘又三里爲十八盤灘又四

里爲三皇灘又一里爲蘇溝灘又二里爲孤山子灘又七

里爲馮家園灘又六里爲大小桑園灘又四里爲堰口灘

又三里至竹林關自龍駒寨至此計一百二十里又入山陽境一里爲州

河口與銀花水合又十餘里至古樹扒兒灘又三里至雷

家洞自州河至此計一十四里又南入商南境三里爲王家洞又八里

爲姚家站灘又七里爲木巨石灘又二里爲梁家灣又一

里爲皮鉢子灘又一里爲回回鼻灘又六里爲周家灘又

六里爲鴛鴦灘又二里爲戴溪河又四里爲紅白蘿蔔灘

又四里爲香毛灘又二里爲鐵匠樹灘又二里爲竹裏溝

又二里爲陽信里
又一里爲羊皮峽又七里爲武關河又五里爲畢家洲又
五里爲呀虎灘又八里爲觀音灘又四里爲跼路灘又一
里爲新灘又四里爲瓦房灘又十四里爲師婆子灘又三
里爲鼈灘又五里爲皮狐子嶺灘又四里爲官渡灘又五
里爲黃龍尾灘又五里爲徐家店灘又四里爲龍虎三灘
又六里爲草場灘又四里爲巴東灘又五里爲青泥渦又
一里爲黃石梁又四里爲烏龍灘又四里爲重盤灘又四
里爲猪槽灘又一里爲滾子溝又五里爲釣金崖又十五
里爲木耳灘又十里爲香花溝又十里爲連灘又十里爲
馬鞍灘又四里至梳洗樓其下爲不靜灘又六里爲亂石

灘又八里為白石灘入浙川界自雷家洞至此計二百二十里

三省邊防備覽

險要上

淑江嚴如煜輯

險要

邊界相連要隘

夔府大江以南接界鶴峯建利恩施各州縣酉陽所鄰龍山永順各縣均往時夜郎地雍正年間改土歸流山陡谷幽其險極矣而民風質樸百餘年來事端絕少即宜興漢夔保介在江漢之間山多田少地多新墾各省流徙之人著籍其間五方雜處民情浮動自勝國以來荆襄流民頻年積聚暨末造張李各賊竄伏其間豕突狐嘯蔓延二三十年始就底定嘉慶年間教匪滋事擾累者亦七八年在楚則秦蜀之守當嚴

在秦而川楚之防宜固但窺堂奧者必由門戶而入涉階除者必從藩垣以進左鄰之樹或掩光於右鄰北宅之雷或滴零於南宅則邊境相連之要隘不可不講矣牖戶綢繆鑿前卽以悲後輔車憑倚固我亦可保人茲將邊境相錯之區爲彼此共守之險者另作邊界相連說

巴東在大江南與巫山接壤塗徑在江北界嶺之險巫巴共之火峯屬巴東南至鯢魚溪北至九灣子均爲要隘九灣子山勢環折徑路崎嶇尤不易度

朝陽坪巴東縣之西北與巫山接界要隘東至石墓老林邊六十里西至巫山屬麻線坪四十里迤南爲巫山觀音巖汛北

至馬嶺三十里

馬嶺巴巫接界山勢陡險西至相思嶺五十里險阻
烏雲頂在馬嶺北接連巫山營之八石坪汎爲巴東至
縣交界東至相思嶺西至陰條嶺均六十里南至葱坪北至
小當陽均十餘里砍伐老林闢爲徑路朽木狼藉橫塞山巔
緣木而過登跋維艱

相思嶺巴東巫山房縣三縣交界要隘東至馬嶺西至烏雲
頂均六十里取道老林中北至巴東東坡口十五里又至麻
線坪十五里南至巫山高四節二十里均老林邊行走嶺上
有三佛寺一座官軍勦辦賊匪時常駐於此

三才圖會卷之八
地理
地毗連地方犬牙相錯者曰川陝曰川楚曰楚陝均只兩省
相連惟川之大寧陝之平利楚之竹谿則爲三省交錯之區
卽誌稱三縣相連舊有三十三隘今亦不能悉舉也

陰條嶺高數十里古木叢篁徑路逼窄爲房縣大寧巫山連界
之要隘西至竹山大寧相接之笑天龍六十里南至巫山大
昌之黃草坪觀音巖二汛均五十里北至房縣之九湖坪四
十里老林斷續不相聯屬地極高寒間有客民墾種苦蕎麥
麥一二年後卽不能成熟故地當要隘荒涼特甚

張公橋在大昌東北東至笑天龍九十里西至大禾田七十里
北至竹山洪坪汛一百五十里北至竹谿向家壩八十里西

北至平利瓦子坪二百里爲鹽廠赴興山房縣必由之路礪路崎嶇澗流湍激行人目眩心悸

蕭家坡大寧鹽廠營分汛東至竹谿屬香溪界嶺六十里南至徐家壩汛五十里西至鷄心嶺汛六十里北至竹谿之豐溪汛一百二十里山徑四處相通最爲要隘

香溪界嶺竹谿所管東至大禾田五十里西至蕭家坡六十里南至徐家壩五十里北至竹谿向家壩五十里東北至核桃園五十里山徑四通亦爲要隘

大禾田竹谿所管接連鳳凰山老林東至張公橋七十里西至香溪界嶺七十里南至徐家壩四十里北至竹谿向家壩五

十里核桃園五十里山徑四處相通亦爲要險

鷄心嶺汎大寧鹽廠營所轄山苦草壩陡上四十里至嶺北過
母猪洞石峽三十里至平利瓦子坪嶺高出霄漢陟其上陝
川湖北各山均羅列如兒孫太白所云上有六龍迴日之高
標下有衝波逆拆之激湍此嶺實爲相肖一夫當關萬夫莫
開然官兵賊匪之由間道相攻者必避此絕險由嶺東一百
五十里之豐溪汎間道入蜀者一百二十里至蕭家坡東南
至譚家墩一百二十里繞萊子壩西至鹽廠營所轄一碗泉
汎一百里則往太平路也山中路路相通飛鳥不到人可度

越信哉

豐溪汛駐有竹谿營守備兩面高山汛在山麓溪岸地勢逼窄
南由廟子壩洞賓口小關子界嶺上老鼠檻一百二十里而
至鷄心嶺西由舖子嶺皮洪溝千竹河七十里而至鎮坪南
則往蕭家壩東南往向家壩均一百二十里山徑崎嶇最爲
要隘

鎮坪營平利所管東口爲湖北豐溪汛鎮坪當西口地勢平坦
溪水溪洞較豐溪爲宏厥陝西設都司一員兵四百名東南
至大寧鷄心嶺七十里西南由上茅壩乾溝中心石一百四
十里而至鹽廠營所轄之一碗泉正西由竹溪河至化龍山
又由化龍山至八仙河分路至四川之兩扇門偏巖子山幽

谷暗易以藏奸毗連三省邊境處處可以相通最爲要隘故經參各元戎頻駐節於此

西溝界嶺東至豐溪汛九十里西至鷄心嶺九十里北至鎮坪營一百一十里南至蕭家坡九十里林旁礮路盤折逼仄極爲崎嶇

西面河界嶺上下峻坂共三十餘里東至豐溪汛四十里西至鎮坪營五十里雨營汛文報必由之路

文彩溝界嶺北接光頂山西爲河溝綿長四五十里寬一二里三四里不等老林斷續路從溝礮上行極爲崎嶇

大光頂山光頂山高巔雲表林木蒼蔚自文彩溝起至紅巖

溝止袤長五六十里高二十餘里上寬十二里爲竹谿平利
接界大山往時賊匪多竄匿其間至竹谿城二百四十里平
利城二百九十里山溝出白土嶺要隘

竹葉關竹谿所管在光頂山北曾家壩南川楚往來經由平利
者多取徑於此東至撰河塘六十里竹谿縣一百八十里東
北至平利縣二百一十里牛頭店四十里西至鎮坪一百五
十里南至唐家坪五十里山徑崎嶇四處相通最要關隘邊
徼有事爲兩省必守之險

劉家坪東北至竹谿二百里西北至平利二百四十里龍山凹
至竹谿一百里平利一百二十里蔣草壩至竹谿八十里至

平利一百里榆樹壩至竹谿六十里平利八十里山徑往來均爲邊徼隘口

白土關今平利縣城扼湖陝邊界要隘地勢雄濶爲自來必爭之險嘉慶三四年土民以賊匪往來築土堡以守計寬二里許七年因平利縣治卑窪四面高山敵得俯瞰舊城爲溪水冲塌移縣治於關民間沿舊稱曰白土關不言平利縣也由關東六十里爲關壩兩山夾峙一線中通爲平利竹谿交界處白土關營分把總一員駐守東五里秋溝塘竹谿營把總一員駐守由秋溝至竹谿地稍平坦由關壩至白土關則四曲曲折有以增關之險也

董家梁由平利之老虎溝汝河東北直上土山漫坡距汝河四十里至洵陽石門子三十里銅錢關三十里竹谿西棚四十里亦爲要隘

銅錢關洵陽所管西距董家梁三十里北至洵陽神河八十里東至七里關二十里南至竹谿分水嶺五十里

七里關洵陽所管崇山疊嶂爲湖陝要隘舊設有守備專營北至金河口四十里東至梓木樹壩五十里西至竹谿安河塘三十里安河設有竹谿營把總分汛

梓木樹壩洵陽所管由金河而上一路連山疊嶂扼湖陝之要隘南爲竹谿地軍興時壩北愉忻寨民擒首逆陳潮官於此

魯家鋪在梓木樹壩之東至界嶺三十里與白河縣接界

聖母山白河所管峯高千仞崔巍崇隆爲白河竹山接界大山
東南至竹山吉陽關二十里茅塔寺五十里東由山麓行四
十里至左吉關爲鄖縣界沔陝扼要之區

黃山嶺在聖母山西白河縣所管亦竹山白河交界要隘距龍
觀塘三十里馬鞍橋六十里

白河縣與楚省接界漢水迴繞東下出城十里木瓜塘卽鄖縣
所管漢江北岸爲鄖西縣地直至洵陽縣藍灘之北陸路爲
洵陽鄖西接界

牛心石當一、二天門之西峭削嶙峋號爲天險軍興時駐大營

防堵

三天門鄖西所管一天門二天門三天門兩面巖峽中通一線沿石磴而登所謂十步九折巒巖巒者也洞天石扇忽然中開軍興鄖西令孔繼幹練十三卡鄉勇洵陽令嚴如煜國仙河十七寨互相防堵賊匪至此者聞風卽折回他竄一天門由黃山松丁家壩至廟川三十里至高橋溝十里

上津堡亦往時縣治距鄖西縣一百二十里地勢雄濶湖陝扼要之區西北與山陽縣之漫川關連界漫川爲水碼頭甲河小船由漢江進者可以上抵漫川上津漫川水陸相距均三十里南至一天門一百零五里西北至三岔河七十里三岔

河至心川嶺一百里

廟川亦鄖西西路要隘至歐家川四十里至小心川三十里至東西川九十里與洵陽鹽店峽連界

丁家坪至滾子坡三十里至李黑溝六十里與鎮安縣東茅坪連界

兩岔河山陽所管三十里至漫川關水路下至上津徑通甲河口中間寬坪新灘均水碼頭

散水臺商南所管十里至界牌壩十里金家坪鄖西所管往來要路

富水關商南所管二十里至桑樹坪十里與河南淅川縣界牌

交界

龍駒寨在商州東一百里地勢雄濶小船由州河東下直抵樊水陸通衢最爲要隘設有州同分防東南由月兒灣竹林關山路二百四十里至郿西之金山寺正東由桃花舖至武關頭道嶺九十里與商南接界

武關由四條嶺試馬寨四十五里至商南城

梳粧樓商南所管至月兒灣交河南浙川界至縣城一百一十里此路驛馬可以行走

自商州東北維南與河南之浙川盧氏閿鄉陝西潼關華陰接壤亦往時賊匪流竄之地最宜防範

山鷄心嶺而西界嶺一道綿亘千餘里北歷平利磚坪紫陽定遠西鄉南鄭褒城寧羌南歷大寧城口太平巴州通江南江廣元平武則川陝二省交界接壤之區也自徐家壩一百里至一碗泉

一碗泉鹽廠營分汛山徑逼窄孤峯挺拔爲川陝要隘東至中心石六十里東北至平利上茅壩四十里至城口後坪汛一百三十里自此而西一路皆界嶺矣

偏巖子楊泗巖均在界嶺之中老林深處南至蘆捍洞三十三楊泗巖至火燒柵五十里北與平利之八仙河汛西南與太平之望鄉壩老鴉口黃墩汛馬鞍山均皆相通相距在百里

內外故往來搜捕多取道於此

兩扇門城口營所管至漁肚河三十里石山壁立狀似城牆中
開一缺如門至板棚子七十里又三十里至油榨坪三十里
至八仙河汛南二十里金鷄梁又二百二十里至城口廳

南天門在兩扇門之西約八九十里亦城口廳所管兩扇門南
天門至大小亮埡子踞川陝之脊均有未開老林寬四五十
里七八十里不等北六十里青草坪又三十五里漳河坪山
峽逼窄溪水盤紆扼南天門兩扇門之要西南十里中岡溪
又三十里嵐溪汛爲城口營分防距城口三百一十里磚坪
營二百二十里

火燒梁磚坪所管通楊泗巖山徑南至太白河三十里又三十里至茨蓬溝

小界嶺紫陽縣所管南至城口廟壩子三十里北三十里至鐵佛寺

陡嘴子在小界嶺西北四十里至太山廟西二十里至城口廳廖山溝

大界嶺由八道河跌馬坎至斑鳩關九十里南至太平高頭壩三十里大小界嶺陡嘴亮壩山巒險削老林箐鬱與兩扇門南天門無異高頭壩爲太平大竹河汎與斑鳩關汎會哨之地

大亮壩在大界嶺西距大岔二十里至太平龍莽河十五里
二州壩山勢陡險下臨溪澗往時太平興安會哨之地紫陽
設有二州壩主簿其地逼窄荒涼不能存住移居茅壩關外
煙墩壩十八盤絕險礮路至關稍爲平夷

大竹河卽紫陽任河於巴山直下萬峯相連之中忽有小溪可
以行舟畧爲界斷然其流不深故皮窩舖之山徑與界嶺相
連不知中有小溪也

紫溪河距太平皮窩舖五十里距二州壩十里小澗水歸大竹
河

鹿池壩定遠所管距太平皮窩舖五十里西北至九拱坪五十

里山勢高峻磴道崎嶇

滾龍坡太平定遠交界之地在鹿池壩西五十里至太平梨樹溪三十里至定遠漁渡壩汛五十里土山陂陀陽斜順下蓋定遠之爲東川屏障者其險在由西鄉堰口進倒峪口面子山巖寨子等處石壁陡立一線羊腸盤繞澗水瀾路之中二百餘里不減五丁金牛峽也下滾龍坡至太平廳惟近城之觀音峽路從水溝中行夏秋漲發每有淹滯冬春坦行無阻秋波梁距鹽廠二十里巴州所管今改歸太平廳姚家壩亦川陝要口定遠三元壩漁渡壩俱由此入四川通江七年設巡檢於此九年改移漁渡壩

竹峪關通江所管崇山環抱深澗盤廻極爲雄峻東北則爲巴州太平入秦之路東至官壩九十里西至九子坡九十里關北六十里與定遠九元子關交界石磴陡險上下六十里關上有老關廟往時川北道同漢南道會哨之地竹峪關騾馬大集場山西鄉至西安山外者多取道九元子而林木蓊蔚徑路幽險行旅恒有戒心

簡池壩山勢陡峻下臨深澗當川邊之衝要頗有市集黎壩巡檢寄治於此距竹峪關汛一百二十里瓦石坪守備營四十二里通江兩河口五十里定遠白楊關六十里

迴軍壩南鄭所管當通江入漢川之衝過天池狗毛洞羊圈關

爲通江所管東之花石梁西之巫山垭爲南鄭三卡北三十里至青石關兩山夾峙羊腸一線設有巡檢司汛官

巫山垭之南曰小壩巖方坪之南曰官倉坪廟壩之南曰桃園寺皆南鄭地與南江縣北境毗連南江境俱未闢老林路從林邊行走至漢中府城一百六十里

紙房壩在褒城黃官嶺之南過乾溝河綿纏河溝間有老林入南江境至龍神殿則百餘里均老林矣川陝邊界老林獨此一帶尤爲深遠

土地嶺在褒城鎮天坡西均入南江老林之路

西流河在褒城銅廠西九十里與南江廣元接壤最爲幽險城

塙巖一帶人馬難以行走

周家營寧羌所管東北至西流河三十里南至南江老林北過板倉塙紅火子林下卽鐵鎖關汛

芷子山寧羌所管經常家河毛塙子下寬灘河至廣元寬灘汛四十里

流沙坡廣元所管至寧羌八廟河七十里又廣元蒿川子北至寧羌關口塙三十里廣元曾家河至寧羌石塙子三十里各路雖皆相通烏道羊腸僅可攀援而過

七盤關寧羌所管與廣元分界盤曲而上西至轉斗舖二十里東至黃壩驛二十里南棧大道不甚險阻

三省通防
金山寺昭化所管至寧羌柳樹壩亦川陝小道

青木川寧羌所管交龍安府平武縣界西通階州邊境極爲幽險東北至陽平關二百四十里

由火峯界嶺西北至鷄心嶺湖北四川相連之險由鷄心嶺東北至白河縣藍灘牛心石東北至龍駒寨皆湖北陝西相連之險由鷄心嶺西北至青木川陝西四川相連之險其地皆犬牙相錯邊徼有警設卡防堵必互相聯絡庶以壯聲威相距里數最爲要鈴也

三省廳州縣險要

南鄭縣川原平曠四達之區惟縣南七十里之青石關扼通江

南江要路兩山夾峙礪路羊腸盤屈而上頗爲險峻然關不足守必須於關南之廻軍壩天池子設卡爲隘又關東五十里之花石梁山勢高峻而爲天池子問道西南則由小壩秦家壩至梅子壩紅廟塘可出南壩也梅子壩與花石梁亦要卡又由南江老林而行則梅子壩西七十里之廟壩巫山垭尤爲要卡

城固縣與南鄭相聯一望平蕪南山之盤壩天明寺等處包在南鄭西鄉之內惟北境之小河口場在高山下兩小溪會流於前東由老荒林回子壩則通華陽山內北山桅桿石則通留壩西江口盤屋牛尾河等處西北由西公河五道梁則通

褒城馬道爲城固南鄭要隘教匪新兵之擾多取道於此顧其地要而不險常於小河口南四十里之鷄公梁設卡防堵而已與東西原公東西留村平壩相近就小河安壘築礮座足爲郡東北屏障

洋縣西南與城固西鄉接壤平原如掌東之黃金峽真符村皆古縣治峽爲漢江第一險而陸路則無阻惟北之華陽山漢王山大小牛嶺而進計一百五十里華陽亦古縣治西水環其前沃田數十頃東北則大古坪北山二郎壩進都督河厚畛子則蓋屋老林西至佛爺坪通城固小河口西南之鐵冶河下流爲瀼水河卽古之瀼谷東八十里至茅坪汎路稍平

坦四面皆巒疊嶂林木翳蔚四塞之區設有縣丞都司

洋縣東北與盩厔寧陝接壤山大林深地勢奧衍計寬數百里
東南之金河口大陽灘東之良心河大河壩北之間觀河三
岔河皆要而不險其東北由東嶽廟至袁家庄教場坪扼盩
厔寧陝西鄉洋縣要路地稍平坦可以安壘築堡爲東北籬
垣

西鄉西北與城固洋縣接壤爲平原漫坡東北之子午谷在西
鄉者爲午谷在長安者爲子峪南北相對通稱之曰子午地
勢逼窄河流一道合洋縣西岔蒲溪焦溪並五郎各山谷之
水環繞於前夏秋可行小船東至石泉饒峯關四十五里北

兩河口五十里南至洋縣渭門六十里漢南要隘

五里壩在西鄉東南二百四十里崇山峻嶺路徑崎嶇高川平坦宜稻不過數頃北連石泉東通紫陽南接定遠扼要之地設有縣丞分防

司上汛縣南九十里自堰口南進懸巖峭壁六十里直至市上場集仍設石礮之中南則面予山大坡設有分汛把總爲定遠營所轄議者有定遠分汛不必在西鄉之地不知西鄉至定遠二百七十里從山峽中行者計二百里較各道最爲險阻有事時數十人據之萬衆難過而兩邑之聲息不通於司設此汛所以通定遠聲援而不致孤懸邊末者也

大巴司縣西七十里南七十里龍池場爲西鄉西南要隘自定遠分廳西南境之險盡分定遠惟西境之樓房坪菩提河一帶老林與通江空山壩接連從定遠瓦石坪左右老林川匪竄入者以龍池場爲扼要之區宜於瓦石坪營分弁兵防堵則伏莽無慮

定遠廳東路星子山間有老林五塊石在星子山下最要者爲觀音塘東通紫陽之茅壩關南由松樹壩九拱坪至鹿池壩當太平空處西由大草地至漁渡壩北由五塊石至中楮河五里壩山徑四達最爲要隘近設把總分防

漁渡壩廳南九十里卽古漁肚路四川之南鄉縣地勢平坦無

可扼之險而東通星子山觀音塘東南接鹿池壩淩龍坡與四川太平接壤西南七十里至姚家壩九元壩與四川秋波梁竹峪關相接經畧額侯常駐大兵於此設有巡檢把總嘉慶九年同知嚴如煜捐築土堡一座

瓦石坪汎廳西二百四十里在大巴山中大巴山之在陝者東至清水河北至大巴關鍾家溝西南環以三元壩簡池壩西大池白陽關魁星樓樓房坪菩提河細辛壩周圍七八百里千巖萬壑古木叢篁伏匿之洞寨竄遁之徑路紛紜叢雜搜捕爲難嘉慶十年設守備營兵二百四十名修土堡一座而巴山中日就謐寧矣

襄城縣東與南鄭接壤西與沔縣連界均平原無城城北鷄頭關最爲峻險由關至青橋驛五十里兩面懸巖峭壁鳥飛難度中夾烏龍江湍激異常至觀音碕一帶石壁無路賈大中丞燒石鑿之始能行走宋荔裳先生有棧道平歌詳漢中誌藝文賈名漢復字膠侯官至尚書西北有雲霧山老林由馬道西溝麻坪河小溝均可緣山攀援而進

黃官嶺縣南一百一十里舊設守備今改把總文職分防巡檢地不甚險而最爲要隘東至紅廟塘四十里牟家壩八十里與川省通江路通而由私渡河法慈院來者與由梅子壩來者山徑取道於此南則由塘口子白巖河而至南江西則由

鋼廠西流河而至廣元北則由新集問家壩協稅集梁家營而達南鄭沔縣軍興時王提軍長制軍駐大營在此防堵沔縣東南二面皆襄城外包不與四川連界定軍山縣南十里連峯疊巘佳氣蔭蔥忠武侯屯兵之所侯墓卽在山椒古柏千章蔚然深秀

青羊驛白巖河南與寧羌接壤茶店子西與畧陽交界均要而不險

高平場在縣北一百里由舊州鋪進關山旋風山秧田壩而至場山勢巖嶽崔巍鳥道羊腸計四十餘里西路由九臺子下石頂關茅壩當黑河深處東北由關下過余家河亮垭子火

潯陽獅子河至襄城之雲霧山層巒疊阜一路均皆老險
汚邑要險

寧光古武都郡五丁關在州北四十五里石巒壁立澗水中流
周上下三十里峽長數里行人從礪路涉澗流攀援而上爲
棧道絕險然由州東之鐵鎖關可趨沔縣阜川定軍山由關
下之漫川烈金壩均可至陽平關守關者以間道爲慮

鐵鎖關州東六十里地勢逼窄徑路崎嶇南上嶺卽板倉壩下
至廣元所管東北過阜川至定軍山不過百數十里地稍平
夷昔昭烈避五丁之險由母倉山徑至定軍則以此爲間道
陽平關州西九十里舊蜀漢所守陽平水經注稱其南臨沔水

西阻白馬以地勢度之在今沔縣地沔西出寧羌當巴蜀兩川之要北出畧陽扼天水三郡之衝隴蜀咽喉誠爲扼要以馬孟起守之馬墓在沔城東五里其明徵也現陽平在嘉陵江東岸距沔水尚二百里非陽平故地特蒙其名耳然

國初經畧巴蜀以嘉陵爲運道駐有守道副將以重防維後裁去協道仍設參將分駐州同則亦要地也

留壩廳爲褒城鳳縣所分南之武關北之柴關亦爲險要西江口在廳東九十里北接熬屋之太白河牛尾河東連漢中之境杆石西通鳳縣之進口關在老林之邊防維不可少也鳳縣東之進口關三十里至白雲四十里至方柴關

川而至斜峪東南由寇家關西江口桅桿石而至小河口此
路較之鷄頭青橋畧爲坦夷忠武侯由樂城出斜谷路也行
旅多取道於此

鳳嶺高峻南自心紅峽陡上嶺埡下至縣城山椒上下五十里
殊爲要隘

唐藏寺在縣西北接連太渠通甘肅吳寨利橋由十八盤龐家河
而至方石舖由草灘孤廟嶺而至草梁驛由楊家嶺長橋而
至黃牛堡地處四達崇山峻嶺徑路崎嶇最爲要險

何家巖縣東六十里石壁隆嵒蹬路逼窄當畧陽沔縣要路設
有把總汛

三才圖會
畧陽古興州北扼池河西控隴道縣治在象山下東爲八渡河西則嘉陵江交會縣城之南山勢嵯峨江流湍激形勢雄壯自宋南渡爲宣撫安撫開府之地

道林溝由寧羌大安驛後進口至畧陽接官亭出口東當福寧山麓蟠折八十里爲往時興州往利州大道

白水江在縣北一百二十里江爲唐人所開運道經西江口置口而至畧陽陸路南至八渡山上下五十里石徑陡險北沿小溪上虞關礮路七十里至徽縣西通青泥河西淮壩東通三川中川至金池院東北由鍋厰巖寫壩進棧壩老林爲畧陽險要設有弁兵防守

黑河即沮水河發源紫柏山水漲時污濁故土人呼曰黑河
鳳縣之張口石至二溝場八十里爲黑河頭由二溝場經
縣茅壩八廟河張家河西至畧陽冷峪河爲黑河中由冷峪
經鞍橋觀音寺海棠溝至黑河壩爲黑河尾盤折於層巒疊
嶂之中收頭二三四各溝八面河冷峪河常家河棧壩林各
小溪澗數十道之水四面老林東則光化山萊子嶺紅羊河
石頂關西北則大陽山棧壩常家河火地秦家壩環繞不斷
而常家河棧壩老林最寬廣約一二百里與兩當徽縣接聯
光化山張口石鐵廠七八座鍋廠寫壩鐵廠三四座常家河
紅羊河圓木廠猴柴廠大小十數處黃圪塔等幽暗之處兼

有硝磺厰沿河兩岸開林墾山多安徽川楚之人結板屋有
家室種地爲生低山種黃豆包穀高山種洋芋燕麥蕎麥能
務本業惟各厰之人多係隻身傭工豐歲於謀食外尚得工
價歉歲包穀清風糧價昂貴厰主停工此輩無資以生鬻然
不靖故撫馭極難入黑河各路由沔縣北過高坪場石頂關
南則經小礪河老龍溝東由留壩棗木欄翻光化山東北取
道武關西溝翻菜子嶺各山一上下皆六七十里磴路陡險
中無人煙惟北由留壩南星陳倉故道而入至鐵爐川守營
營七十五里路雖迂而稍夷西由畧陽娘娘壩過仰天窩至
觀音寺山不甚高而礪路逼窄黑河地爲畧沔鳳西當

五縣險要最宜防範

建安古金州地唐時山南東道金房鄖襄均爲所轄舊城在漢江南府縣城守所治新城距舊城里許在山下總兵暨中左營弁兵所駐郡城平坦人煙稠密東至鄖陽五百六十里東北至商州七百里南至夔州九百里西南至太平八百里南至漢中七百里西北至寧陝四百二十里爲三省邊境扼要適中之地

牛蹄嶺與洵陽摩王嶺接壤狗脊關與平利舊縣毗連均爲要隘不甚險阻

九里岡老鼠嘴琉璃溝北往鎮安路九里岡山起人面極其陡

峻琉璃溝與洵陽麻坪河接連路行山峽中最爲幽遠
牛山綿亘百餘里高入雲霄有金牛洞卽昔人掘劍刺黃腰獸
處險固非要

王莽山縣北二百八十里傅家河水出焉山西燕子嶺裏爲二
郎山四面陡峻其頂平坦可容數千人瀑布飛洒林木蒼翳
常有劇盜據此下爲鎮安下茅坪由傅家河從上下至山上
下松樹壩山礪中行可抵郿城

三條坡高峯鼎峙插鼓臺土阜巋然亦古戰場也

磚坪府西南二百二十里軍興之時府西南與四川太平遠矣
賊匪往來伏竄民無寧宇遂就嵐河與湓水交會之處築水

圍城一座糾民貯糧顧其土係浮沙遇雨水便至坍塌乃於西二十里磚坪另築土堡以駐兵民其土性亦不甚固旋於西北小阜上相度作新堡地勢壯濶百雉屹然爲府西要隘近議設廳治

苦竹關磚坪東七十里距汝河壩三十里與平利接界要隘孟石嶺危峯峭嶂地勢雄壯地屬平利爲磚坪營分防汛地北至竹葉關六十里南過金貓關松樹林藍家山霸王廟一百二十里至平利八仙河汛羊腸鳥道古木叢篁要而兼險萬人塞磚坪西南九十里山勢高峻四面石壁頂有平地可容萬衆軍興時居民在此修寨避賊官兵亦貯糧其間西至紫

陽斑鳩關六十里南至觀音巖五十里經巖屋杙廟坪大河
至四川城口廳界最爲要險

麻柳壩磚坪營分汛在萬人寨山麓西至斑鳩關六十五里北
至鐵佛寺五十里扼紫陽安康之要路極崎嶇

鐵佛寺西至銀珠壩五十里當大道河洞河之衝戴花嶺在磚
坪北九十里與安康分界崇山峻嶺亦要隘也

銀杏庄在磚坪東北六十里至猪槽溝三十里東至水碓溝三
十里當平利磚坪之衝

漢陰廳東七十里雙乳舖西五十里池河舖百二十里之間
川坦途並無險阻

馬屋山一名祿山高出雲表叠障十二層北阻越河南臨漢江綿亘三百里跨漢安石紫四邑北爲漢陰南爲紫陽兩縣往來山路並險至洞河大小道河均從此山經過

鐵爐壩北七十里崔巍挺拔東至螞蝗山二十里東北進龍洞溝至瓦子溝九十里與寧陝接界

素珠嶺東一百二十里連峯叠巘如一串牟尼西至黃竹枰二十里北至黑水河三十里與安康接界蛇徑崎嶇極爲險阻

石泉縣東至池河爲往安康大道北出漢江順流而下梅湖爲定遠西鄉行旅要衢

饒峯關縣西七十五里山極崔巍磴路險阻羊腸鳥道上下三十里吳武安兄弟所據以拒撤離喝者東下雙鹽塘四十里西至子午河四十五里兩面高山中通一線關南北均有小徑可繞至關後故武安終不能守而退入西鄉也

展龍壩在饒峯北四十里山勢陡峻磴道崎嶇爲寧陝赴漢南捷徑

大地嶺陡險異常石泉寧陝要路

紫陽縣漢江城臨山周望之如螺北則鳳凰山南北東北爲漢江入境出境

斑鳩關縣東南一百八十里崇山峻嶺徑路崎嶇北五十里五

作雲五峯挿天上多凹谷常有伏莽東南六十里至萬人寨
南九十里至大界嶺西五十里至小界嶺小界嶺在大界嶺
左爲上界往來要路

平利縣西南一百五十里連山疊嶂之中稍開小嶂大竹河
環繞於前西南至二州壩三十里南至亮垵子七十里西至
紫溪河八十里皆通太平要路關南峻嶺一十八盤真十步
九折鬱巖巒矣最爲要隘

瓦房壩縣南三十里在大竹河旁川中小舟往來樊襄停泊之
處路通定遠太平亦爲要隘

平利縣新城在白土關距舊縣治九十里地當要隘

女媧山縣西北五十里岡巒起伏蜿蜒四十餘里山頂林木蒼蒼蔚然深秀陟其巔頂洵陽之神河壩河摩王坪均在目前秋山坡縣東南一百五十里山徑蟠折上下險路三十里

曾家壩縣東南一百六十里地勢平坦東通竹谿之竹葉關由川中偏巖子楊泗巖往竹谿者多取徑於此

化龍山鎮坪西九十里從隆幽邃分支別派綿亘百餘里古木參天平溪竹溪諸澗均導源於此陝境漢江南巴山而外惟此老林最爲茂密

八仙河卽嵐河之腦四面連山疊障中有小水田坪沿溪而下北至漳河坪爲鎮坪要隘西南過兩扇關爲城口營地延徑

一經折危巖峻嶺之間最爲幽險

鎮坪至平利三百六十里之間處處礧路中經石砦河白土嶺
白珠坪牛頭店琉璃埡秋山八角山山骨峻嶒須攀援而過
夏秋水漲阻滯輒至旬日冬春冰結石滑人馬失足無不立
斃此路南至大寧奉節之途號稱絕險

洵陽縣府東一百二十里背枕崇山面襟巨流史漢高祖遣酈
商徇郿關卽縣治也

蜀河口洵陽東一百四十里在漢江北岸蒲帆竹纜上沂興漢
下達襄樊騾馬馳運北通商洛沽客雲集爲漢江中小都會
邑令嚴如煜捐修石堡一座

鹽店峽兩山夾峙一線羊腸當山陽鎮安商州要路

陽山爲終南山分支穹隆舉犖西岔河盛家河駱家河小河皆導源此山千巖萬壑綿亘百餘里舊時老林甚多近已漸次開墾地之阻奧足以伏莽

神仙洞在縣南七十里幽邃深阻可藏萬人青山寨嶙峋壁立頂稍平厥軍興時寄貯兵糧嘉慶六年提督楊遇春殲張添倫等七股賊匪於此寨勇助力邑令嚴如煜更名曰六次寨神河口大寨在縣西南七十里神河金河繞其左右與寨相連聲勢相連四面石壁因險築壘當安康平利之衝時寄貯兵糧

高壁洋縣西六十里在漢江北岸下爲淩灘水涸時跣淺可過
嘉慶七年於南北兩岸各結小寨一座架礮防範

盼陽嶺卽盼官山縣西一百里崮崱崔嵬上下五十里北至趙
家灣二十里東北出沙溝二十里西南下麻坪河二十五里
最爲要險

兩河關縣西北一百七十里乾祐河於鎮安仁河自寧陝交會
於此北接仙人碕南扼王家溝後倚峻岡前臨溪澗石磴崎
嶇爲商洛赴梁洋必由之路歷來川兵多取道於此然避其
險者由鎮安東茅坪出傅家河山溝可至漢陰興安由小河
榜子土十二嶺可偷越至沔陽各處間道不可不知

白河縣成化時分洵陽五里之一設縣治北岸爲鄖西地東至
鄖縣水路二百八十里陸路二百四十里縣西南聖母山旁
隆翠律綿亘六十里東南至竹山吉陽關一百四十里南至
竹山解家陽坡一百八十里又由右手進溝三十里至梓木
樹壩再西出鎖子溝五十里至洵陽七里關均爲要隘

寧陝廳新城在五郎關之西里許地勢雄壯而城中高亢無泉
水北近高山敵可俯瞰西南白雲山逼臨對面地勢凶惡
有空城之變老城相距十五里東面溪流湍激南岸亦有
山但地稍平坦且與焦家堡毗連足爲輔車之助故文
修安

修安老城

山廟廳東八十里老林慈蔚山勢崎嶇東過手扒崖通鎮
摩王坪南與漢陰鐵爐壩連界北通孝義亦要險也

火地嶺廳南六十里距澗溝嶺二十里山勢陡險異常往石泉
要路

四畝地廳西一百二十里連山疊嶂古木叢篁翠嶺紛紜四十
里爲洋縣陳家壩通大河壩良心河西北六十里至麻房子
火地入老林接連藍屋壩口豹狼坡各老林爲山內要隘舊
設都司營改把總巡檢分防

洵陽壩廳北一百二十里在腰竹嶺老林內辟開小壩約寬十
餘里南至油磨溝三十里北至鷄公梁三十里爲往東江口

營必由之路路從老林行走如過青楊巷也

東江口營廳北二百四十里由長安峪口至五郎關重山複巘沿途並無平壩而東江口爲適中倚山臨水山勢陡峻溪流湍激南至徐家壩四十里北至高關五十里沿溪流而下爲仁河通鎮安西路東通月河經竹山溝沙羅帳至孝義廳地東北由高關經沙嶺子百丈礪至鄂縣之澇峪由青龍峪入十坪接連盤屋之秦嶺營在老林之中四路相通爲山內扼要之區江口駐長安主簿南十里白神廟設都司一員隸漢

中鎮

夾嶺在江口北四十里老林中兩山夾峙峭壁千仞上最

爲要隘寧陝山內分大小兩脈其由金鵝河腰竹嶺向東之
山嶺大林茂產松杉美材大連抱高十餘尋足供棟梁之用
者一望皆是而山澗盤屈窄狹不能運出山民墾荒砍伐朽
腐燒灰殊可惜也夾嶺一路木多雜色作枋作薪美材頗少
寧陝設廳之始數百里古木叢篁茂密蒙蔽狐狸所居豺狼所
嗥人煙零星荒涼特甚官吏視爲畏途論者多議建置之非
宜迨後教匪滋事豕突狼奔大兵四面堵擊賊勢窮蹙竄伏
老林經畧額侯適於寧陝廳屯重兵駐勁將就近搜捕以逸
待勞以主禦客庸功得以迅奏否則環老林數千里猾賊據
爲巢穴不易完結建廳之舉殊爲遠猷碩畫矣

孝義廳本咸寧山內之地同寧陝添設廳治所轄地方不逮寧陝之遼澗而西接寧陝南連鎮安山大林深實爲幽險新移廳治在舊縣關距鎮安九十里

大山舍廳北九十里由咸寧尹家衛進峪上下秦嶺七十里山勢穹隆一徑羊腸蟠折於叢林懸巖之間稍不戒則人馬墜深澗舍在秦嶺南麓地稍平夷設廳之始建治城於此後以四塞逼窄移廳治於舊縣關

盤屋山內東與鄠縣寧陝南與洋縣西鄉西南與城固留壩西與鳳縣寶雞岐山內均皆接連其地方之遼澗山谷之深峻甚寧陝自寧陝孝義設廳賊之竄林者於兩廳不能

伏匿多潛盤屋山內縣境老君嶺以南卽入老林其北近縣
治一二百里開設木廠圓木猴柴由辛峪黑峪西駱峪而抵
渭河漸次墾闢老君嶺而南厚畛子四十里至都督河西六
十里至黃柏園西北至頭太白埡二太白埡三太白埡則徑
通岐山之三才峽西南六十里至二郎壩由二郎壩西北觀
音峽厥陽坡鷄冠梁至磨房溝北山鷄冠梁之分水嶺均通
鳳縣山內由二郎壩西大小牛尾河平頂關至留壩之太白
河南由都督河進二十四壩藥水西至華陽由都督河東佛
爺坪火燒營至鼇山大南小南由火燒營南至洋縣之涼風
壩大古坪月亮坪由厚畛子東南太平河長嶺至板房子黑

圪塔與寧陝老林相接翁鬱蒙密周圍數百里南山老林此
內最爲廣濶留壩太白河可運圓木猴柴城固之渭水河導
源亦在盤屋但自慶山以下節節皆爲民堰故近寧陝洋縣
一帶老林壅闕者尚少稽查防範不可少疎由華陽取道二
郎壩至厚畛子二百四十里華陽縣丞謝大名訪查古蹟自
藥杵二十四壩有路通都督河較二郎壩路捷一百里老林
中拔木通道兩面古樹一徑蟠折竟日在青霧蒼煙中行完
沿途無客店安頓須裹糧而前則捷徑不易行矣